





N. 24.

273

Compt.

LE  
SERVITEUR  
FIDELLE.

L'HOMME D'ESTAT.

DIALOGUE.

M. DC. XIV.

Case

F

39

326

161453

THE NEWBERRY  
LIBRARY

54-2356 3 274

# SERVITEVR

## FIDELLE

**M**ONSIEVR,  
Ie vous suis seruiteur tres-humble,  
j'eusse pensé faire tort à l'amitié qu'il vous a  
pleu me tesmoigner jusques icy; si j'eusse laissé  
passer le iour de mon arriuée sans vous venir  
baïser les mains, & receuoir vos commande-  
mens.

L'homme d'Estat,

Hé? mon grand amy, que ie vous embrasse,  
vous soyéz le tresbien venu, à quel jeu vous  
auions nous perdu si long temps?

Seru. fid. Telles gens que moy, Monsieur, ne  
se perdent pas si aisément: si ie lay esté me voi-  
cy recouuert pour vostre seruicé.

L'hom. D. Mais encor d'où venez-vous?

Seru. Monsieur: Il y a vn an passé que ie suis  
tracassant les Prouinces de France, pour cer-  
tains affaires particuliers que i'y auois. Bien  
marry que mon absence m'ait osté le moyen  
de vous continuer le seruice que ie vous ay  
voitié de longue main, ie suis prest d'en payer  
les arrerages, si vous auez agreable de vous ser-  
uir de moy.

L'hom. D. Ie vous remercie de vos honne-  
stes offres. Faites aussi estat que si autrefois  
vous m'auéz veu affectiōné à vostre bien vous  
me trouuez encorés porté de mesme affectiō



aux occasions qui s'offiront de faire pour vous : Mais c'est assez Brisons icy les ceremonies, & vous asseuez, à fin que ie vous entretiène plus commodément. Que dit-on d'où vous venez? Auez-vous veu Mōsieur vostre Maistre.

Ser. fid. Monsieur, i'aye l'honneur de luy faire la reuerence, n'ya que deux iours a Chasteau Roux, comme il montoit à cheual pour la chasse, & des l'heure mesme m'en suis venu.

L'hom. D. Ne trouuez-vous point de changement en luy? Ces broüilleries passées n'ont-elles point alteré sa bonne disposition?

Seru. fid. Il est tousiours en mesme estar, Dieu mercy : au moins que i'aye peu recognoitre, au peu de temps que i'ay demeuré près de luy. Ce Prince est assez courageux, pour resister a toutes fortunes, & prendre la resolution qu'il faudra aux choses les plus difficiles.

L'hom. D. Vous l'avez bien laissé au besoin, ne vous en sçait-il point mauuais gré?

Ser. fid. Les Princes de sa qualité ne manquent iamais de seruiteurs & d'assistance: Mesmes en telles occasions que les passées & puis il sçait assez, que si ie ne me suis lors trouué près de luy, ce n'est pas faute de zelle à son seruice. La necessité de mes affaires, m'ayant priué de ce bien, avec regret pourtant de ne luy auoir encores tesmoigné en ces dernieres actions ce que ie luy suis.

L'hom. d'Est. Ouy, mais l'eussiez-vous peu faire en bonne conscience, veu que ces desseins sembloient opposez à la volonté du Roy, qui est vostre premier Maistre?

Ser. fid. Le seruice que ie luy eusse rendu n'eust point esté incompatible avec celuy de mon Roy, sçeuſt esté celuy du Roy mesmes, il est trop sage Prince, pour entreprendre quelque chose au desauantage de sa Majesté, sa qualité le couure de ce blasme. Ce seroit s'en prendre à luy-mesmes, & s'offencer de ses propres armes: Aussi pense-je, qu'à present sa Majesté est assez informée de la pureté de ses intentions, & m'asseure, que le temps qui esprouue toutes choses, fera voir à tout le monde, qu'il n'a esté porté en ceste action, que de l'amour qu'il a pour son Roy, & pour son Estat: Et quand il n'auroit de ce, autre tesmoignage, sa prompte obeïſſance à se desarmer est vne preuue manifeste de sa sincerité: Bien qu'il peut entrer en des ombrages, pour voir tousiours sus pied vne armée capable d'offence, neantmoins il n'en a point esté estonné, fortifié de sa Iustice & innocence de ses actions, laquelle des le commencement s'est fait voir telle, qu'elle fait encores par sa retraitte en ses maisons, en attendant les commâdemens de son Roy, plus seul que sa qualité ne deuroit permettre.

L'hom. d'Est. A la verité ceste promptitude est vn grand tesmoin de sa iustification: Car je croy bien que s'il eust voulu se roidir, il eust trouué prou de gens qui eussent volontiers secondé ses desseins, comme en France il n'y en a que trop qui ne cherchent que des pretextes.

Seru. fid. Je vous en responds, & en puis parler comme sçauant, Pendant ces tumultes, ie courus par trois ou quatre Prouinces,

& des plus grandes, ie sçay ce que j'y veis: mais si les affaires eussent passé plus outre, ie crains qu'il eust par apres esté bien malaisé de retenir les desbauches qui se fussent veuës. Vous ne penseriez pas combien de gens estoient aux escoutes, pour voir le cours de ces grabuges, & n'eust esté que le iugement commun estoit (ce qui est arriué) qu'ils estoufferoient à leur naissance, nous eussions veu beau jeu: mais Dieu nous a voulu encores espargner pour ce coup, son Nom en soit loüé. Apres luy nous deuons cela à la prudence de la Royne, & à quelques hommes de biē qu'elle a aupres d'elle; car chacun sçait qu'il n'a pas tenu à plusieurs, & des Principaux de son Conseil, que ses affaires ne se soient vuidées par le sang, & Dieu sçait à quel dessein: Mais bien que ie ne sois pas grand Clerc, si me souuiens-je auoir leu dans vn autheur familier à telles gens, que pour rendre les Princes irreconciliables, & entretenir diuision entr'eux, il leur faut conseiller de faire quelque tour outrageux à partie aduetsē: Ces principaux conseils estoient tirez de là, pour desespérer toutes choses, & mettre le feu par tout, à fin d'establir leurs affaires en ces embrasemēts. Vous sçauēz, Monsieur, que depuis que le glaue est vne fois tiré hors, que les armes sont fourbies, il est malaisé de les remettre dedans, & à la rouille, il ne faut que donner le branle aux choses, & elles vont apres comme d'elles-mesmes.

L'hom. d'Est. Vous dites vray, le plus assésuré en ces esmotions ciuiles est de suiure la voye



la plus douce, & auant le desordre, i'entends a ceux qui veulent la paix : Car l'ouurage que la guerre produit de part & d'autre, aigrit tellement les affaires, qu'il est apres bien malaisé de les composer, & si on le fait, c'est tousiours avec perte pour le Roy, car le bon Seigneur paye tout : mais ou auez-vous appris toutes ces nouuelles, puis que vous n'estiez pas icy.

Seru. fidel. C'est le bruit qui court d'où ie viens, & de la maison de Monseigneur: Vous pouuez penser qu'il en a de bons aduis: Mais s'il plaist à Dieu que le Roy & la Roynes puissent gouter ce qui leur en sera dit, ie m'affeure que nous verrons du changement & que la vergongne de telles gens sera descouuerte.

L'hom. d'Est. Vous en parlez avec passion, elle est excusable en vn seruiteur fidelle tel que vous estes.

Seru. fidel. Non fayie vous iure, i'en leue la main au Ciel, toute passion est vicieuse, & Dieu m'est tesmoin, que le seruice de mon Roy, m'est plus chet que tout autre: Je le dis & le diray deuant tous, voire deuant Monseigneur & m'en sçaura bon gré : car ie sçay qu'il ne veut autre chose de moy, que ce qui se peut legitiment: mais me fasche de voir qu'il n'y ait plus d'amour, ny de fidelité en France, & que nostre nation qui de tout temps auoit eu ceste reputation d'aimer ses Princes & leur estre fidele, depuis quelques années en ça ait degeneré de ceste belle qualité, & soit tombée en son contraire. Je ne sçay d'où nous est venu

ceste contagion : mais ie voy qu'elle pululle de iour en iour entre nous, & que les gens d'esprit mesme s'en laissent infecter à la honte & au mespris de toute la nation.

L'hom. d'Est. Il est fort aysé de nous resoudre de cela, il n'y a que cinquante ou soixante ans, que ceste corruption est entrée vers nous. Auparauant nous ne la cognoissions point, elle nous est venuë de dehors, & à pris son temps dans les minoritez & ieunes ans de nos derniers Roys, leurs peuples les aiment plus tendrement en cest estat par pitié, & par consequent ceux qu'ils voyent s'entremettre de leurs affaires, sans entrer plus auant en cognoissance, si bien ou mal, de sorte qu'ils ont à contre-cœur ceux qui plus clair-voyans y pensent establir vn ordre par l'introductiō de quelque nouveauté, estimans quelque affection qu'ils y apportēt, que leur profit particulier marche tousiours deuant celuy du Roy. Or ce changement ne se peut faire sans bruit, pour l'interest de ceux qui ont le gouuernement, lequel, essayans de se conseruer ne manquent pas de faire brigues opposées, & de descrier les procedures contraires : Celaleur estant de tant plus aysé, qu'ils le font, couuerts de l'autorité du Roy. Or est-il que nostre Estat estant sous des Loyx d'une Monarchie hereditaire, il est impossible qu'autre que les Princes du Sâg puisēt oser vne telle entreprise. Tellement que se faisans chefs de part, toute la haine va fondre sur eux, comme autheurs des changemens qui arriuent.

Ser. fid. La condition des Princes est donc bien

bien miserable, puis que mesmes leurs plus sinceres & plus vtils actions, emportent vne reconnaissance si esloignee de leur merite.

L'hom. d'Est. Cela leur arriue faulte de se disposer de bonne heure, & auant que le besoin leur soit venu, à ce qui est requis en tout homme de condition si releuee, & capable d'entrer en gouuernement. Bien qu'ils soient Princes, si sont-ils en quelque façon assujettis aux peuples & leur nom despend de l'estime qu'ils en font. C'est pourquoy ie tiens qu'ils doiuent autant qu'il se peut honnestement, se rendre agreables par toutes sortes de courtoisie, d'humanité, & affection iointes avec vne probité non desguisee, & amour de Iustice: Car il est sans doute que ces belles conditions esmeuent infiniment la beneuolence des peuples enuers ceux qui en sont honorez, & cela leur est comme vn vent fort & gaillard en poupe, qui les pousse droitement à l'execution de leurs desseins.

Ser. fid. Ie ne doute pas que telles qualitez ne soient bien sceantes & necessaires à vn Prince: mais certes elles courent vn grand hazard, puis qu'elles sont suiettes, à l'opinion d'un peuple lequel donnera aussi tost son iugement, en faueur de quelqu'un affectant la tyrannie, qui n'aura que les apparences de ses qualitez, comme à celuy qui en fera veritablement orné: Car qui est l'homme à qui la verru plaise, qui puisse estre agreable au peuple? Ne vous souuiet-il pas d'un mot de Demosthene à ce suiet fuyant la ville. O Pallas, pourquoy te plais-tu tant en



trois bestes, la Choïette, le Dragon, & le peuple? Comme s'il eust voulu dire à l'ignorance auuegle, à l'enuie & à l'inconstance, qui toutes trois se rencontrent en cét animal à plusieurs testes? Dailleurs, il semble que ce soit seruitude à vn Prince de mettre soin à se rendre plaisant & agreable à ceux, sur qui la nature luy a donné vn tel ascendant,

L'hom. d'Est. Ie ne dis pas qu'il trauaille à imiter les mœurs & le naturel des peuples pour s'y former: mais de les cognoistre, & vser enuers eux de moyens honnestes & licites, par lesquels il se les puisse gagner: car ayant en main ceste aduantage il est apres fort aisé à tel Prince, de ramener toutes choses à l'ordre qui luy semble le meilleur, quelque trauerse qu'on luy puisse faire: cest applaudissement general, donnant terreur & crainte a ceux qui s'y voudroient opposer; C'est vn des manquemens de quelques vns de nos Princes. Comme ils sont naiz tres-grands & esleuez; les choses qui sont aux dessous d'eux leur paroissent si petites, qu'ils en font estat, comme si elles n'estoient point du tout, & cela les trompe, les peuples font les Princes, s'ils n'auoient point de subiects ils seroient particuliers. De façon qu'il leur est bien fort necessaire, de viure tellement avec leurs peuples; ( s'ils veulent estre aimez & obeïs ) qu'ils leur facent paroistre, qu'ils ne les ont point en mespris. Ce defect leur est plus important qu'ils ne pensent: Car il arriue quelquesfois que ceux qui sont bien au dessous d'eux le sachant bien faire, s'autorisent tellement qu'ils



s'égalent à eux, & souuent leur font la loy. Si bien qu'il leur seroit beaucoup plus vtile de despoüiller quelque chose de ceste Majesté, & s'accommoder à ceste humeur. Par ce moyen ils feroient d'yne pierre quatre coups, ils en acquerroient nombre de seruiteurs affectionnez, osteroyent le moyen de le faire aux moindres qu'eux, affermiroyent l'Estat en leur maison, & couperoyent le pied à la tyrannye. Le deffaut de cest vsage, nous a produit deux changemens en cest Estat: De la race de nos premiers Roys en celle de Pepin, & de celle-là en celle de Huë Capet, & qui prendra la peine de feuillerer nos Histoires, il verra quel vne des causes de ces changemens & des principales, a esté la solitude de nos Roys, qui pensans tenir vne Majesté decente à leur dignité, ne se faisoïent voir à leurs peuples qu'vne fois l'annee, & encores avec pompe affectee. Cela du conseil de ceux mesmes qui se sont assis sur leurs Throsnes. De sorte que ie tiens estre necessaire à tous nos Princes de communiquer familièrement avec leurs peuples, & de fois & d'autre leur paroistre es actions publiques, ou leur vertu & dexterité se peut faire voir: Car ayant yne fois gaigné ce point de se voir ayez, quelque chose qu'ils facent en suite, sera receu avec applaudissement de tous: mais il faut commencer par là: Autrement le succez de leurs entreprises, ne leur peut venir a souhait: Et bien que vous en semble.

Serd. fid. Certes, Monsieur, vos raisons sont si fortes & si concluantes, que ie m'y range volontiers! Je ne faudray iamais de me tenir à vos

maximes, qui auez & la science & l'experience. Mais ce n'est pas tout de le sçauoir dire, il le leur faut persuader : Et vous sçauiez qu'elle peine c'est de donner aux Princes conseil qui leur soit plaisant & vtile, car ils craignent infiniment de receuoir & admettre la raison, comme vn maistre qui leur commande, de peur qu'elle ne leur cōmande, & de peur qu'elle ne leur oste ou retranche ce qu'ils estiment le bien de leur grandeur & puissance, en les assujettissant à leur deuoir.

L'hom. d'Est. Pour ce faire, il faut qu'ils se disposent à prendre en bonne part les remonstrances qui leur sont faites par les sages & anciens seruiteurs de leurs maisons, à qui ils doiuent donner ce credit, de leur dire franchement ce qu'il peut y auoir de manquement en leurs actions, pour se soubmettre volontairement à l'obseruation des regles qui par eux leur seront donnees: Car ils doient sçauoir, que l'homme est le plus grand flatteur de soy-mesmes & specialement l'homme Prince, leur enflant le cœur de vanité & presumption, quiles empesche de iuger des choses sainement, & selon la verité si bien que s'ils ne se laissent conduire, ils se voyent le plus souuent trompez. Or ie vous ay dit qu'il faut qu'ils s'y disposent: car ceste disposition est toute en leur volonté, & qui ne l'aura point il ne peut esperer chose qui vaille, Cependant c'est vn vice assez familier en quelques vns de nos Princes, & comme hereditaire en leur maison: cela prouenant d'un excez de courage, & de viuacité naturelle en

ceste race, qui les emporte à executer plustost qu'à entreprendre. De mesme source leur vient ceste promptitude à prendre l'essor, & se retirer de la Cour au moindre mescontentement qu'ils y reçoient, comme si leur absence les y deuoit autoriser d'auantage, & ne considerent pas, que par ce moyen ils font beau ieu à leurs ennemis, qui prennent cependant des aduantages, qu'il est apres bien malaisé de leur oster: & à eux de reprendre ce qu'ils ont quitté, ils doiuent sçauoir qu'aussi bien qu'au jeu de la paulme, qui quitte la partie la perd: Il n'y a rien tel que se tenir prest du Soleil, on en est plus éclairé, il eclypse à mesure qu'on s'en esloigne: il vaudroit bien mieux qu'ils eussent appris à dissimuler les petites offences, & tenir ferme que de les ressentir à la chaude colle, & briser le temps & la vicissitude des affaires de la Cour, presentant de iour à autre des occasions de se venger, que l'absence fait perdre. D'ailleurs telles procedures augmentent bien fort l'audace de leurs ennemis, pour entreprendre de nouvelles offences: Il estiment que ces fuittes se facent par timidité & par crainte. De là ils viennent au mespris.

Ser. fid. O Monsieur! Je ne vous puis passer ce dernier poinct sans repliquer; car vous sçavez ce qui se pratique maintenant, & m'assure que vous serez contrainct de les en excuser: Bien que nos Princes soient de la maison, & par consequent ceux qui deussent auoir plus de part au gouuernement des affaires, si est-ce que la malice de la saison en approche plustost les



moindres , qui abusans de l'autorité de ceux qui ont le commandement absolu , taillent & rongnent de toutes choses à leur appetit , faisans des ligues entr'eux , pour se maintenir en ce credit , & esloigner de toute entremise, ceux à qui elle est deuë naturellement : cela fait que pour ne pouuoir remedier à telles caballes & ne les voir , ils sont quelquesfois contraincts de se retirer en attendant l'opportunité. Autrement que voudriez-vous, qu'ils fussent ? il est rude extrêmement aux enfans de la maison de se voir reduicts à passer souz la loy de ceux qui la doiuent prendre d'eux.

L'hom. d'Est. Ie le confesse , mais si se doiuent-ils contraindre en cela & vsfer de patience en attendant l'occasion : Cependant ne laisser pas de tesmoigner tousiours de l'affection au bien du seruice du Roy , & del'amour de Iustice, au soulagement du public , & comme il n'est pas qu'en vn si grand gouuernement, il ne se face quelquesfois des choses qui biai sent au deuoir: C'est là ou ils doiuent prendre le temps, & s'efforcer de les ramener au droit fil , en faire tel bruit que le son en soit ouy par tout , & si le mal importe au general , & qu'il soit de telle consequence qu'il doieue passer par l'approbation publique, ils ne doiuent craindre des'y opposer courageusement , en faire leurs protestations bien amples, y deduire leurs raisons, & au besoin les rendre publiques. Ce faisant ils donneront d'eux vne bonne odeur à tous & vne crainte , qui fera changer le bien en mal, & en



despit de tous, les restablira peu a peu en leur lieu où ils se pourront de tant de plus affermir qu'ils y deuront continuer leurs iustes actions.

Ser. fid. Vous dites bien, mais pensez vous pas que les Princes aussi bien que les autres sujets, n'apprehendent l'autorité du commandement absolu, & les affronts? Leurs qualitez les en exemptent-ils? Ne les y auons nous pas veu assujettis par la violence de la saison? & si nous l'auons veu, ne la pouuons nous pas voir encores? On ne manque iamis de pretextes pour desguiser telles entreprises.

L'hom. d'Est. Pour cela il faut poser ce fondement quel Estat se gouuerne sous vne minorité ou ieunesse, & qu'ils ayent pour eux la Iustice, & la voix publique: car en vne plaine majorité, cet vsage seroit dangereux, le Roy pouuant vser au gouuernement de son Estat, de sa puissance absoluë & propre mouuement. Ce qu'autre ne peut faire s'il est en minorité, Je dis donc en ce cas qu'ils ne doiuent craindre vn tel attentat, cent mil hommes se presenteroient pour leur deliurance, il n'y faut que du courage & de la resolution, comme par exemple. Pensez-vous que si Monsieur le Prince en ces dernieres rumeurs se fust contenté de faire ses protestations contre les alliances d'Espagne, qu'il les eust publiees, & les raisons qui le mouuoient (qui sont tres-grandes qu'il en eust parlé hautement & resolument (sa qualité luy donne bien ce priuilege) il n'en eust pas remporté autant de gloire qu'il a fait, les ayant retardees par les armes? si eust sans doute, & m'as-

seure qu'il eust eu plus d'adherens, & d'aprobateurs de son action qu'il n'a pas eu: quelques iustes que soient les armes, si elles n'ont la Majesté du Roy en teste, elles sont odieuses: Et est certain que ceux qui sont couuerts de ce titre, ont tousiours l'aduantage de leur costé & l'applaudissement de tous, bien que souuent au detriment public. Ce n'est pas qu'aux extremitéz il ne faille quelquesfois vsler de ces remedes, & vaut mieux donner ainsi quelque petite incommodité au public, que pour le vouloir trop espargner, le laisser tomber en vne plus grande: Mais ie dis qu'ils ne le doiuent faire qu'apres l'vsage de tous autres expedieus plus gracieux: Et croyez que telles douces procedures, ne laissent de donner de grands empeschemens aux fauteurs des aduis contraires, ils y pensent trois fois auant que d'executer leurs desseins. Pour moy ie tiens qu'en telles faisons & affaires les paroles & les escriits ont autant de force que les voyes de fait, s'ils sont accompagnez de la preud'homme de leur auteur, & de la iustice de leur suiet. Je dis cela, pource que quelque chose qu'ils fassent, il faut que le Roy demeure le Maistre, & qu'ils flechissent sous son autorité, ou de ceux qui s'en couurent, qui fait que leur honneur y demeure engagé, lequel ils ne doiuent hazarder mal à propos. Vous me direz que tels escriits ne manquent pas de responses, & que chacun trouue assez de raisons pour donner couleur à son fait, il est vray: Mais & les vns & les autres demeurent au iugement des peuples, qui ne laissent neantmoins dans tous  
ses

ses desguisemens, de discerner la verité d'auec le mensonge, & le bien d'auec le mal: Et se disposer en suite chacun en soy, de recevoir les vns & eüiter les autres.

Ser. fid. Voire-mais, Ne sçavez-vous pas qu'il ya des affaires qui demandent la celerité, & l'exécution aussi prompte que la deliberation? Celle-cy (comme j'ay appris) estoit de ceste nature. Monseigneur ne s'est retiré qu'apres auoit fait ses remonstrances pour la retardation, qu'elles ont esté repoussées, & que la résolution a esté prise de marcher: N'estoit il pas temps ou iamais de se declarer?

L'hom. d'Est. Tels conseils ne s'exécutent pas si chaudement, il pouuoit apres ses remonstrances faire ses oppositions & protestations en Parlement, en termes conuenables a personne de la qualité, & icelles publier, sçeuft esté vn preparatif qui eust disposé les esprits des peuples a mieüx recevoir le reste de son action; car de le faire apres que le dé est jetté, & que l'on a passé le Rubicon, cela est plüstoit receü pour excuse d'une faute commise, que pour tesmoignage d'une saine intention. Et puis telles leuées ruinent plus le peuple quelque ordre qu'on y puisse donner, que ne feroit vne guerre toute reformée: Et cela ne fait que charger la reputation du Prince qui les conduit. Il luy faut vn grand & important subiect, & vn grand tesmoignage de contrainte: Autrement il n'en emporte qu'une malueillance publique.

Ser. fid. Si est-ce qu'en la pluspart des provinces d'oü ie viens, son dessein a esté extreme.



ment bien receu, & mesme la procedure : car chacun a sçeu qu'il ne s'est porté aux armes ( bien qu'il fust desia absent ) qu'après auoir esté du tout esconduit de ses iustes demandes : Et comme vous sçauiez qu'en France toutes choses se sçauent, on a aussi fort particulièrement descouuert d'où venoient ces menees, Et tellement que chacun a dit que certains Seigneurs de la Cour, qui ont encor bonne part au gouuernement, faisoient sous main roidir la Royne par leur partisans, à l'execution de ce dessein pendant qu'eux faisoient mine de la porter à la douceur, à fin en ce cas d'accord de n'en encourir blasme ny la mauuaise grace de nul : Et cependant lors que la Royne portee d'un meilleur conseil, s'estoit resoluë à pacifier toutes choses, trompez de leurs esperances, ils auroient fait toutes sortes d'efforts pour l'en empescher, comme si l'autorité de nostre Roy en eüst receu quelque échec : Et c'est la que leurs desseins se sont descouverts, qu'ils ont fait paroistre ce qu'ils auoient au dedans, & de quel esprit ils estoient menez.

L'hom. d'Est. On en a bien dit autant de deçà, & peut estre est-il vray, les grands se seruent de tous moyens pour s'autoriser, & ne faut pas douter qu'ils ne fussent bien aises, que monsieur le Prince fust tousiours esloigné, la presence les offusque ils ne sont que petites estoilles près de son Soleil, si tost qu'il paroist leur clarté ne se remarque plus. C'est pourquoy il est bien à croire qu'ils n'ont pas manqué de volonté pour retarder cest accord : En cela de-



nous-nous recognoistre que Dieu a tousiours  
soin de ce pauvre Estat.

Ser. fid. Mais cependant quelle pitié de voir  
dans vne Monarchie, des subiects, des princi-  
paux officiers, former des desseins particuliers  
au desauantage public? Il est à craindre que le  
plan n'en soit ancien, & qu'on ne veille reba-  
stir sur les vieilles ruines: Et de fait n'avez-vous  
pas sçeu que depuis peu, on a fait courir sous  
main parmy le peuple, certaines Genealogies à  
l'auantage de quelque maison estrangere, & au  
preiudice de celle de France (desenterrans par  
maniere de dire toutes les vieilles resueries de  
Numa pour leur donner cours, lesquelles par  
prudence & diligence de la Cour ont esté sup-  
primees :) Cela ne tesmoigne-il pas assez que  
la vieille caballe se remuë.

L'hom. d'Est. Est-il possible que cela soit ar-  
riué: s'il est ainsi, il n'y a point de doute qu'ils  
ne resueillent les anciennes pretentions, de  
mon ieuneage on fit les mesmes choses. Ce  
sont sans doute vieux fragmens des memoires  
del'Aduocat Dauid qu'on renouuelle faux, mes-  
chans, pernicieux. O le grand coup d'en pou-  
uoir descouurir les auteurs, pour les punir  
exemplairement, comme faux tesmoins de  
faux sujets, & perturbateurs du repos public.

Ser. fid. Je ne sçay que c'est & d'où cela vient:  
mais ie crains qu'il n'y ait rien de bon. Pour  
moy ie trouue qu'ils ont plus beau-jeu que ia-  
mais, si les suiets y estoient disposez.

L'hom. d'Est. Ouy dea, si autresfois on l'a  
bien entrepris, lors que nous auions quatre

Princes viuans de posterité Royale , que nous auions encores vne maison fertile en Princes de mesme sang, tous grands hommes faicts & courageux, que pourroit-on faire maintenant que tout ce grand nombre est reduit à quatre seulement & encores la plûspart bien fort ieunes? car pour les suiets le temps & l'artifice les y dispose. Nous n'auons encores dans nostre Estat que trop d'esprits infectez de ce vieil leuain : il ne faut que parler a ces nouveaux Apostres, comme ils scauent prendre quand ils veulent toutes sortes de visages: ont-ils l'artifice d'y transformer les peuples , & au besoin trouuer des expediens pour se deffaire des Princes. Mais nous auons a esperer que nostre Roy, qui par la grace de Dieu , nous promet beaucoup de soy suiura en cela les maximes du feu Roy son pere , & scaura bien destruire par sa prudence & son courage telles menees , & les entrepreneurs d'icelle : Leur tenant la bride ferme, & ne les autoriser que bien apoinct, il y a de ce frayé vn chemin grand, spacieux, fort aisé à suiure, il est à esperer qu'il ne s'en voudra distraquer: C'est vne des choses qui luy doiuent estre le plus representees par ceux qui auront l'honneur de son oreille, à fin que son Estat ne retombe dans le precipice , d'où le feu Roy son pere la relené.

Ser. fid. Cela seroit à esperer, si nous estions ailleurs qu'en France. Mais à present tout y est corrompu, il n'y a plus de fidelité, plus de loyauté à son Roy, plus d'amour de sa patrie : Autant de grands, autant de petits Roys : Beau-

coup entre-eux aiment l'Estat : mais pour le conuoiter, pour en souhaitter la tyrannie : il n'y a plus de mesure en leurs desirs, les Ministres se laissent corrompre , ils sont à qui plus leur donne , ils disent au moins la plupart comme Iudas : Combien me voulez-vous donner & ie vous le liuremay : le bastiment de leurs affaires n'est iamais accompli que par la ruyne de leurs Maistres. Monsieur, Monsieur : Croyez qu'il faut bien chercher pour trouuer vn homme de bien.

L'hom. d'Est. Vous vous trompez, il y en a nombre en France , gens qui ont l'ame frappee à la vieille marque , qui portent assez de desplaisir de ce qui se passe , mais ils souspirent sans dire mot : Nicodemites d'Estat qui pous-sent la saison de l'espaule , esperans que celle-cy en produira quelqu'autre plus raisonnable & plus libre.

Ser. fid. Ouy-mais, il y a du vice en ce temporizement, cependant tout se perd. Est il possible qu'il ne se trouue pas vn Caton , à qui le tesmoignage de sa probité & preud'homme donne le courage & la hardiesse de dire franchement les choses comme elles sont ? sans ter-quiercer ? sans biaiser ? l'espere que si fera & d'auantage, que le disant, Dieu luy donnera efficace de le persuader , au grand bien de nostre Roy, & de son Estat. Ce seroit honneur de mourir pour ceste liberté. Curcius & Decius qui se deuouierent volontairement pour le salut de leurs pais , en ont remporté telle gloire, que leur non n'en mourra iamais : cest acte ne me-



riteroit pas vn moindre tombeau. Ceux-là par  
 leur mort deliurerent vne ville & vne annee  
 seulement: Et ceux cy vn Estat composé de plu-  
 sieurs milliers de villes, & de plusieurs millions  
 d'hommes. Croyez, Monsieur, que si Dieu n'a  
 pitié de nous, nous sommes en danger de n'e-  
 stre pas à couuert de tous maux. Feu nostre  
 Grand Roy, avec tant de peine, tant de sueurs,  
 tant de hazards de sa personne, nous auoit ac-  
 quis vne paix de vingt annees: Et il semble que  
 nous courions à toute bride pour en recher-  
 cher le trouble; Grand malheur, que nous ne  
 pouuons demeurer en repos. Les peuples ce-  
 pendant n'entendent point ces menees, ils n'y  
 contribuent point. Cinq ou six esprits broüil-  
 lons & ambitieux conuoiteux de choses nou-  
 uelles minent ceste harmonie: Sera-il dit qu'un  
 si grand peuple suiue la passion de si peu de  
 gens? N'avez-vous pas encores sceu ce qui ce  
 dit des pratiques qui se sont depuis peu descou-  
 uertes en Poitou, l'exécution desquelles nous  
 faisoit r'entrer infailliblement dans les mesmes  
 troubles ciuils, desquels par la grace de Dieu, &  
 la valeur de feu nostre Grand Roy, nous auons  
 esté deliurez? Qui vous meut esprits inquiets  
 pendant la minorité & bas aagé de nostre Roy,  
 d'attenter sur les membres de son Estat, & luy  
 faire courir fortune? qu'elle excuse legitime luy  
 pourriez vous donner estant en aage, de vos at-  
 tentats, s'ils luy caufoient vne maladie general-  
 le? quels interests y auez-vous, que vous pos-  
 sedez de la liberalité de nos Roys, si vous n'y  
 adioustez de l'vsurpation. Vous vous trompez,



vous vous trompez grands Colosses, vous conceuez des montagnes : mais vous n'enfanterez qu'une souris, vous n'avez pas affaire à des Princes qui se laissent mener par les oreilles. Ceux-cy ont bec & ongles ils scauront bien avec les bons subiects de l'Estat ruiner vos desseins, & vos maisons, si vous vous esgarez Nos Roys vous ont fait ce que vous estes, il leur est aussi aisé de vous deffaire. Ceste famille, bien que petite en nombre maintenant, si a-elle les promesses de longue posterité, & de l'Empire du monde. Je dis ceste maison qui ne nous produit iamais que de grâds Princes, sages, courageux, autant d'Hercules que de personnes, pour destruire les monstres de nostre Estat, & luy continuer la paix que nostre Grand Hercule Gaulois, nostre deffunct Grand Roy luy a acquise. Pardonnez-moy, Monsieur : Je me suis sans y penser, laissé emporter à un excez d'affections outré de voir que ceux qui n'ont iamais causé que du mal en l'Estat, non contents traouillent encores de iour en iour pour en aduancer la ruine entiere : Et ne cesseront qu'ils ne l'ayent fait, si Dieu n'y met la main.

L'hom. d'Est. Comment vous parlez ? Et si quelqu'un vous escoute ? ne scauez-vous pas que les grands ont les mains longues ? Tous vos compagnons de seruice sont-ils portez de mesme affection qui vous semble estre au bien public ?

Ser. fid. Monsieur, Je n'ay que craindre, comme seroit gloire de mourir pour un si haut subiect. Je suis le moindre des seruiteurs de Mon-

seigneur, & de qualité & de zèle: Nous sommes tous nourris en ceste volonté, d'espandre volontairement nostre sang, pour nostre Roy, pour l'honneur & grandeur de sa Couronne, & le ferons de tresbon cœur aux occasions, Si le Maistre est porté de ceste affection, que doivent estre les seruiteurs? Et puis c'est l'intérêt de Monseigneur, n'est-il pas de la maison? n'est-il pas capable de la succession. Ce luy sont des obligations estroites, desquelles il ne luy est ny honorable ny vtile de se desgager: Il n'y a que la mort qui l'en puisse desobliger, qu'elle manie de penser qu'un Prince de ceste qualité, fust si perdu d'entendement que de s'opposer à son bien propre, mettre le feu dans sa propre maison, & comme s'ensevelir dans les ruines de sa famille? Ce sont des artifices du temps passé qu'on renouvelle: Ainsi auoit-on tasché de diffamer l'auguste nom de nos derniers Princes, peres de ceux qui nous restent: ainsi veut-on faire le leur: Ce sont les mesmes conseils, n'en descouurez pas la ruzé?

L'hom. d'Est. le ne sçay pas ou vous auez esté nourry, mais à vos discours, ie ne vous trouue pas ignorant de nostre Histoire, & la sçaez appliquer à propos & selon le sujet C'est la verité que ceux qui ont cy deuant tant broüillé ce pauvre Estat, ont vû des mesmes moyens qu'on commence de pratiquer: ils iugerent bien des l'entree, qu'il leur estoit impossible d'exécuter leurs desseins, tant que les Princes du Sang seroient prez de nos Roys: Ausquels par le moyen de leur qualité, ne pouuoit estre refusé l'accès des

ces des leur personnes, & l'entree de leurs Con-  
seils. Pour y remedier, ils cauallerent si bien les  
esprits de nos Roys, que les mesmes. Princes  
furent contraincts par les mauuais traitemens  
qu'ils receuoient en leurs Cours, de s'en esloi-  
guer: Et par ce moyen laisser a leurs ennemis, le  
gouuernement absolu de toutes choses, les-  
quels ne perdans point de temps, ne se conten-  
terent pas de leur absceance: Mais encores par  
toutes sortes de libelles diffamatoires qu'ils fai-  
soient courir parmy le peuple, taschoient de dif-  
famer leur nom, comme s'ils eussent esté les au-  
theurs de tous les maux qu'eux-mesmes nous  
produisoient, leur amassant par cet artifice tou-  
te la haine qu'ils deuoient porter, & eux quice-  
pendant demeuroient prez de nos Roys, s'en  
acqueroient la reputation de fideles & affe-  
ctionnez seruiteurs: si l'issue de la tragedie ne  
nous eust fait voir, qu'ils ne les embrassoient  
que pour les estouffer. C'est aussi ce qui doit  
rendre nos Princes sages par l'exemple qu'ils  
ont de leurs peres, nos Roys, pour ne mal-trai-  
ter les Princes de leur Sang & n'autoriser a  
leur preiudice ceux qui ne sont que seruiteurs  
de la maison, & partant de tout point leurs in-  
ferieurs, Les Princes pour seruir cordialement  
le Roy, & ne s'en esloigner, a fin de luy estre  
Colonnes asseurees pour son affermissement.  
Si i'estois capable de leur donner conseil, ie les  
prierois de se ressouuenir de ces choses. De tra-  
uailer a se rendre agreables au Roy leur Sei-  
gneur, se concilier l'amour des peuples par  
quelque acte signalé de Iustice en leur faueur,



& autres tesmoignages de bien veillance. Car-  
 reffer la Noblesse vertueuse, & faire pour elle  
 N'abandonner la Cour pour iamais s'ils n'y  
 sont de toute force contraincts, & par des  
 grands & importans sujets, & encores apres  
 leurs plaintes & publiques & particulieres. Ne  
 paroistre trop enclins au bié de leurs affaires, En  
 leur train, n'estre ny trop prodigues ny trop  
 mecaniques: (l'un engendre l'enuie & l'autre le  
 mespris) mais sur toutes choses ne mépriser les  
 cōseils des sages: Ains ne rié faire sans l'auoir au  
 prealable delibéré avec eux, Si le Prince est mu-  
 ny de ses qualitez ie croy qu'il ne peut pericliter,  
 Monsieur vostre Maistre en a vne grande par-  
 tie: les autres il se les peut acquerir par l'exerci-  
 ce: son grand naturel luy donne cet aduantage  
 de pouuoir tout s'il le veut: & i'espere qu'avec  
 l'âge il s'y disposera pour son bien, pour celuy  
 du Roy, & pour le public. Si vous le voyez vous  
 luy pourrez temoigner qu'en France il a enco-  
 res des seruiteurs qui luy sont incogneuz, &  
 qui luy souhaitent avec passion, sous l'autho-  
 rité de nostre Roy, tout le bien, grandeur &  
 prosperité que merite vn si grand Prince,

Ser. fid. Monsieur, ie vous en remercie, ie luy  
 en feray le rapport, si i'ay l'honneur de le voir.  
 Assuré quil ne sera mesconnoissant de vostre  
 affection, aux occasions qui s'offriront de le  
 vous tesmoigner. Cependant excusez-moy, si  
 la nuit me contraint de prendre congé de  
 vous. Je suis vostre seruiteur tres-humble.

F I N.



286.

182

$\frac{In - 10}{Lab}$

ausgeg.

